

**'Nto mundu chi vivìmu
Tra ieri e oja**

Chi mundu strampalàtu chi stacìmu vivendu
'on c'è nu morzu 'e tregua, si vàcia sempra fujèndu
ni manca puru 'u tempu 'u si pòta riflettira
'a vita, jornu pe jornu, diventa sempra cchiù cara.

Si sta perdèndu tuttu, perfinu 'i tradizioni
'nu mùndu tuttu 'e ràn-di, 'on ce su cchiù guagliùni
i troppi vitamini cangiàru tanti cosi
Si criscia troppu in fretta simu tutti nervosi.

Si stàcia trasformandu l'età de' maggiorenni
ormai doppu deci anni si sèntanu già randi
si sentanu parrara sulu a lu cellulàra
e mungianu buttuni da matina a la sira

'A curpa la dunàmu a li telefonini
chi sballanu 'u cervèdu mandàndu messaggini
'u restu è riservatu a la televisiona
ca cu certi programmi portàu 'a rivoluziona

'On c'èsta cchiù 'a nonna chi cunta cuntarèdi
chi d'icia ca sutta i cavuli nescianu i zzitèdi
'a storia da cicogna ormai è tramuntàta
'on vàcia mancu a storia da bella addormentata

Mo vènanu a la lùcia cull'occhi spalancàti
cu i denti già crisciùti e i labbra già pittàti
appena chi cumìncianu a minàra i primi passi
s'accòrgianu ca 'a stu mundu lavòranu sulu i fessi.